

U skladu sa članom 73. stav (4) Poslovnika o radu Vlade Federacije Bosne i Hercegovine - Prečišćeni tekst („Službene novine Federacije BiH“, br. 6/10, 37/10 i 62/10), a u vezi sa odredbama člana 185. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07 i 2/08) i člana 177. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), Vlada Federacije Bosne i Hercegovine je, na 36. hitnoj sjednici održanoj 20.4.2016. godine, utvrdila sljedeće

**AMANDMANE
NA PRIJEDLOG ZAKONA O IZMJENAMA I DOPUNAMA ZAKONA O
TRANSPLANTACIJI ORGANA I TKIVA U SVRHU LIJEČENJA**

AMANDMAN I

Član 3. Prijedloga zakona mijenja se i glasi:

„Član 3.

Član 30. mijenja se i glasi:

”Član 30.

Dozvoljeno je uzimati organe i tkiva sa umrle osobe radi presađivanja u svrhu liječenja pod uvjetom da se darivatelj za života nije tome protivio u pismenom obliku.

Pisanu izjavu o nedarivanju organa i tkiva poslije smrti u svrhu liječenja iz stava 1. ovog člana punoljetna osoba sposobna za rasuđivanje daje izabranom liječniku primarne zdravstvene zaštite ili nadležnom kantonalnom ministarstvu zdravstva, odnosno Ministarstvu.

Slijepa osoba, gluha osoba koja ne zna čitati, nijema osoba koja ne zna pisati i gluhoslijepa osoba daje izjavu o nedarivanju organa i tkiva u svrhu liječenja izabranom liječniku primarne zdravstvene zaštite ili nadležnom kantonalnom ministarstvu zdravstva, odnosno Ministarstvu, pred dva svjedoka uz pomoć zakonskog zastupnika, odnosno staratelja.

Pisana izjava o nedarivanju organa i tkiva iz st. 2. i 3. ovog člana može se opozvati u svakom trenutku.”

Obrazloženje

U članu 3. Prijedloga zakona, a kojim se mijenja član 30. važećeg Zakona, predviđeno je da je dozvoljeno uzimati organe i tkiva sa umrle osobe radi presađivanja u svrhu liječenja pod uvjetom da se darivatelj za života nije tome protivio u pismenom obliku. Stavom 2. ovog člana propisano je da pisanu izjavu o nedarivanju organa i tkiva poslije smrti u svrhu liječenja punoljetna osoba sposobna za rasuđivanje daje izabranom liječniku primarne zdravstvene zaštite ili nadležnom kantonalnom ministarstvu zdravstva, odnosno Ministarstvu. Također, slijepa osoba, gluha osoba koja ne zna čitati, nijema osoba koja ne zna pisati i gluhoslijepa osoba izjavu o nedarivanju organa i tkiva poslije smrti u svrhu

liječenja daje izabranom liječniku primarne zdravstvene zaštite ili nadležnom kantonalnom ministarstvu zdravstva odnosno Ministarstvu, pred dva svjedoka uz pomoć zakonskog zastupnika, odnosno staratelja. Ovim je članom predviđeno da se pisana izjava o nedarivanju organa i tkiva može opozvati u svakom trenutku.

U odnosu na Prijedlog Zakona koji je dostavljen u parlamentarnu procedure briše se stav 5. člana 30. Zakona, obzirom da se sljedećim amandmanom predlaže da se isti pretoči u odredbu člana 3a. Prijedloga Zakona. Ovo iz razloga kako bi se naglasilo da je i do uspostavljanja registra nedarivanja organa, kao i nakon njegove uspostave, potrebno pribaviti pisani pristanak bračnog ili izvanbračnog druga, punoljetnog djeteta, roditelja, punoljetnog brata ili sestre umrle osobe u postupku uzimanja organa i tkiva sa umrle osobe radi presađivanja u svrhu liječenja.

AMANDMAN II

Iza člana 3. Prijedloga zakona dodaje se novi član 3a. koji glasi:

“Član 3a.

Iza člana 30. dodaje se novi član 30a. koji glasi:

“Član 30a.

Do uspostavljanja registra osoba koje nisu saglasne sa darivanjem organa i tkiva poslije smrti iz člana 6. stav 1. alineja 4, kao i člana 45. stav 1. tačka 4. ovog zakona, dozvoljeno je uzimati organe i tkiva sa umrle osobe radi presađivanja u svrhu liječenja, samo uz pisani pristanak bračnog ili vanbračnog druga, punoljetnog djeteta, roditelja, punoljetnog brata ili sestre umrle osobe.

Nakon uspostavljanja registra iz stava 1. ovog člana, dozvoljeno je uzimati organe i tkiva sa umrle osobe radi presađivanja u svrhu liječenja, uz pisani pristanak bračnog ili izvanbračnog druga, punoljetnog djeteta, roditelja, punoljetnog brata ili sestre umrle osobe, i to u slučaju kada izjava darivatelja o nedarivanju organa i tkiva nije uvedena u registar.

Pisani pristanak bračnog ili vanbračnog druga, punoljetnog djeteta, roditelja, punoljetnog brata ili sestre umrle osobe obavezan je u slučaju kada je izjava darivatelja o nedarivanju organa i tkiva uvedena u registar, a nakon njegove smrti postoji potreba za darivanjem njegovih organa i tkiva.“.

Obrazloženje

Članom 3. Prijedloga zakona koji je upućen u parlamentarnu proceduru, a kojim se mijenja član 30. stav 5. važećeg Zakona, bilo je predviđeno da do uspostavljanja registra osoba koje nisu saglasne sa darivanjem organa i tkiva poslije smrti iz člana 6. stav 1. alineja 4, kao i člana 45. stava 1. tačka 4. ovog zakona, dozvoljeno je uzimati organe i tkiva sa umrle osobe radi presađivanja u svrhu liječenja, samo uz pisani pristanak bračnog ili vanbračnog druga, punoljetnog djeteta, roditelja, punoljetnog brata ili sestre umrle osobe.

Navedenim, nije bila predviđena pravna situacija da se, i nakon uspostave registra nedarivanja, traži pisani pristanak bračnog ili vanbračnog druga, punoljetnog djeteta, roditelja, punoljetnog brata ili sestre umrle osobe, a što je inače uobičajena i redovna praksa u postupanju liječnika prilikom razgovora sa užom porodicom potencijalnog donora organa i tkiva. Naime, u praksi su moguće situacije da se i nakon uspostave registra, dese slučajevi da izjava darivatelj o nedarivanju organa i tkiva nije uvedena u registar. U tom slučaju je obaveza liječnika informirati užu porodicu o namjeri darivanja organa i tkiva sa umrle osobe koja je njihov srodnik i tražiti njihov pisani pristanak za navedeno. U slučaju da pisani pristanak uže porodice nije dat, obustavljaju se svi daljnji postupci transplantacije

organa i tkiva u svrhu liječenja. Osim toga, u praksi su mogući slučajevi da je izjava darivatelj o nedarivanju organa i tkiva uvedena u registar, a nakon njegove smrti postoji potreba za darivanjem njegovih organa i tkiva, za što je potrebno pribaviti pisani pristanak uže porodice. U slučaju, da i pored zavedene izjave darivatelja o nedarivanju organa u registar nedarivatelja, uža porodica umrlog odluči drugačije i to izrazi pisanim pristankom, postupci transplantacije organa i tkiva se nastavljaju. Ukoliko uža porodica ostane pri datoj izjavi darivatelja o nedarivanju organa koja je zavedena u registar nedarivatelja, svi dalji postupci transplantacije organa i tkiva se obustavljaju.

AMANDMAN III

Član 13. Prijedloga zakona mijenja se i glasi:

“Član 13.

“Član 59. Zakona se briše.“

Obrazloženje

U uvjetima kada je članom 3a. Prijedloga zakona predviđen novi član 30a. kojim se, u postupku uzimanja organa i tkiva sa umrle osobe radi presađivanja u svrhu liječenja, uvodi obaveza traženja pisanog pristanka bračnog ili vanbračnog druga, punoljetnog djeteta, roditelja, punoljetnog brata ili sestre umrle osobe i do uspostavljanja registra o nedarivanju, a i nakon uspostave ovog registra, odredba člana 13. Prijedloga zakona, u formi u kojoj je upućena u parlamentarnu proceduru, postaje suvišna. S tim u vezi predlaže se nova formulacija člana 13. Prijedloga zakona kojim se briše član 59. važećeg Zakona, obzirom da je suvišan.

V. broj: ____/2016
20.4.2016. godine
Sarajevo

P R E M I J E R

Fadil Novalić